

明

通

鑑

明通鑑卷四十四

江西永甯知縣富塗夏變編輯

紀四十四

起重光協洽盡元
熙治凡二年

武宗毅皇帝

正德六年春正月壬子朔巡撫林俊大破瀘州之賊于江津俊以藍鄆二賊未滅遣人招諭曹甫甫佯聽命而令其弟瑄刦掠如故指揮李蔭斬瑄首賊遂移江津分七營將攻重慶俊發酉陽播州土兵助蔭遂以元旦掩破其四營賊遁入民家焚之盡斃乘勝搥老營指揮汪洋中伏死蔭復進去賊十五里而軍甫以數十騎突出

遇蔭兵敗走官軍乘勝進圍之俘及焚死者二千有奇
及異紀事本末憲章錄俱系破江津賊于是年正月之
朔中有元旦夜半語蓋據奏報之文也實錄中載之二
月據其奏至之月日也今
據紀事參明史俊傳書之 甲子大祀南郊 戊辰林

俊奏報吳景死事狀言賊至江津御史俞緄避入重慶
委景及都指揮龐鳳禦之鳳要景與俱走景不可率與
史張俊迎敵手殺三賊矢被面亟收兵入保而城已陷
乃大呼曰甯殺我毋殺百姓賊強之跪不屈遂與俊俱

死詔贈恤賜祭葬仍立祠江津祀之

及異吳景死事在
去年十二月實錄

所記正月蓋奏報之月日也惟陷江津之賊明史林俊
傳作瀘州賊曹甫據實錄則云重慶人曹弼均識于此

癸酉四川賊陷營山分巡僉事王源死之源行部川

北會藍鄆諸賊自大甯竹山轉掠通巴至營山源率典
史鄧俊禦之賊縱火焚門源開門力戰遂與俊同遇害
維時總制洪鍾已至蜀檄陝西湖廣河南兵分道進剿
而林俊方破江津之賊不遑顧曹甫衆潰遁俊乃還兵
與鍾會而鍾與俊議不合軍機牽制盜卒不戢 乙亥
以四川布政使高崇熙爲右副都御史巡視四川會洪
鍾等討賊 丁丑南京御史周期雍王佩奏前忤瑾建
言諸臣收相任惠貢安甫等及以事獲罪于瑾之趙士
賢李夢陽等如其年力才識可用者乞復其原職吏部
覆以爲請從之 是月改楊一清爲吏部尙書以孫交

掌戶部又以南京兵尙何鑑爲刑部尙書以王守仁

爲吏部主事守仁以五年陞廬陵知縣其年冬聞瑾敗

始入覲授刑部主事至是改吏部又起李夢陽爲江西

提學副使

致異守仁陞廬陵知縣在五年尋陞刑部主事在五年十二月證之文成年譜其年冬入

覲改授刑部是年復改吏部今據之

二月丙申寅鑑伏誅錮其子孫五

人于西內

壬寅巡視四川高崇熙奏播州楊友之亂

請撫之責令立功贖罪初友編置保甯與其弟愛不相

能諸苗構煽挾友糾衆攻播州焚愛居第及公私廨宇

畧盡愛屢奏于朝至是四川盜熾恐友乘衅而起故崇

熙以其與江津不同因以撫請兵部議友叛逆已著若

復柔之以德慮諸蠻效尤宜調土人及四川兵征之俟其悔過歸誠撫之未晚從之 停江西徵派物料及燒造築器以地方災故也 己酉起左都御史陳金總制江西等處軍務時樂平姚源洞賊汪澄二等攻安仁縣陷之巡視御史王哲及鎮守太監王嵩會兵討之不克指揮秦勲通判梁奎等死焉而東鄉賊王鈺五徐仰三等瑞州賊羅光權陳福一等及贛州大帽山之賊何積欽等方熾廷議以江西盜賊繇起官軍屢失利宜簡大臣一人總制軍事時金守制家居遂起之南直隸浙江福建廣東湖廣文武將吏俱聽節制都指揮以下不用

命者得專刑戮嵩等請調廣西狼土兵爲助金亦以屬
郡兵不足奏請從之尙書楊一清復薦雲南按察副使
吳廷舉蘇州同知李嘉言俱有才畧乃授爲江西參政
僉事俾統領土兵佐金等平賊 是月召工部侍郎李
鏜還鏜築大名隄工未竣又請增築陳橋集銅瓦廂設
副使一人專理會河南盜起命姑已其不急者乃召鏜
而委其事于副使堤役自此復罷 李鏜召還是在是月今
從 三月甲寅山東賊四十餘騎劫掠彰德府回龍驛
入延津轉封丘長垣東明曹等縣百戶張世祿死之詔
山東河南南北直隸巡撫都御史防守要害 丁巳巡

撫薊州都御史李貢等奏霸州劉六劉七齊彥名等流劫山東殺斃京營指揮張英等六人詔巡撫都御史蕭翀會貢分督副總兵守備統領官軍隨賊所在討之戊辰賜楊慎等進士及第出身有差慎大學士廷和子也庚午小王子諸部入河套寇掠沿邊諸堡巡撫延綏都御史黃珂會同填巡官擊却之斬首六十四級獲馬九十三匹捷聞賜敕獎勵命惠安伯張偉充總兵官右都御史馬中錫提督軍務帥京營銳卒討畿輔山東河南之賊先是劉六等既叛復四出剽掠部檄下有司緝捕安肅知縣獲齊彥名繫之獄六等率衆刼去旬

日間號召至數千畿南大震有趙風子鏐者故文安諸生聞劉六等之亂挈家匿渚中賊得之驅之登陸將汙其妻女鏐素驍健有膂力手格殺二賊賊聚執之遂入其黨爲渠魁自是賊勢益橫延蔓山東河南界上連攻濱州臨朐臨淄昌樂日照蒲臺武城陽信曲阜等縣及泰安州皆破之日照典史余清巡官司福禦之皆被殺尙書楊一清建言推用大將及文臣有才望者提督軍務遂有是命 丙子太監張永傳旨近來各處盜賊縱橫多因水旱衣食維艱有司不能振恤遇朝廷下詔蠲免視爲具文徵解重複以致小民冤抑無伸流離失業

相誘爲非苟延性命日復一日實可矜憐其令都察院

出榜分給直隸山東河南四川江西湖廣陝西福建兩

廣用兵地方凡被寇之府州縣概免稅糧一年 己卯

賊犯信陽州指揮僉事馬振等督兵城守賊解去追擊

至湖廣應山縣境官軍失利振及信陽衛指揮陳鎮皆

死焉詔參將宋振分兵千人赴河南會守臣協勦 夏

四月癸未大學士劉忠致仕忠累疏乞休不許至是復

以省墓爲請賜敕給驛歸是年忠典會試甫畢上以試

錄文義多舛召李東陽示之忠知爲中官所齟遂有是

請抵家再上章乞致仕許之

致異據薛氏憲章錄言忠致仕之由謂禮部費宏摘

其會試錄中疵謬語粘貼文字旁託中官入奏張永進之于帝遂有致仕之請王弇州史乘攷誤辨其必無此事今按明史忠傳但言忠爲中官所齟三編日中並言張永嘗造廖鵬謁忠忠僕隸遇之又卻其餽永大恨云云然則忠之以會錄得譴卽永所構也證之實錄但云上摘其文字之疵不言中官亦無一語及費宏是憲章錄之不足信明矣且據實錄忠省墓之請在會錄未進之餘先而以此謂爲宏所構是誣宏也今第據明史書之證中

癸卯總督漕運兼巡撫鳳陽都御史陶玟等

奏淮安顧榆等處盜賊蜂起乞處置兵食下戶部議請以運司鹽課銀十萬兩及截留本年鈔關所入給之因言淮民造麪者歲糜麥數十萬石請權時禁之不許

霸州賊五六百騎自青城過壽光攻濰縣知縣張志臯先期遁去防守指揮張陞知事杜德銘死之 五月甲

寅四川盜藍廷瑞自鹽亭縣焚劫富村及柳邊驛殺百
戶賈雄茂州知州汪鳳朝與戰馬蹶而死盜遂攻破梓
潼掠蓬劍二州劍州判官羅明及其子介義官王思政
鄭廷祿等禦之不克明父子罵賊死思政廷祿竝遇害
詔贈卹死事者而令洪鍾會林俊合兵討之 庚申以
蝗災免陝西華州渭南十一州縣去年稅糧 己巳河
南盜由湖廣應山縣破雲夢掠黃州官兵追敗之乃趨
江西掠星子縣都指揮趙鉞敗之于左蠡復還湖廣
丙子命太監張永會兵部尙書何鑑及科道官各一員
選京營軍南京太監黃偉會科道官各一員選南京軍

備討賊也。是月以提督軍務右都御史馬中錫爲左都御史，右副都御史王鼎爲右都御史，中錫俟賊平回掌院事，兵部尙書王倣坐瑾黨乞致仕，改何鑑爲兵部尙書。明年始以刑部侍郎張子麟進尙書代鑑。四川松潘之賊復起，有綽嶺寺僧倡之，遂聚衆焚紅花屯，指揮胡甯與戰被執，復據黃土坡山殺千戶史寬。總制洪鍾請改巡視都御史高崇熙提督松潘軍務兼理巡撫從之。六月癸未，山西盜李華等起逆，瑾黨亡命者多從之，衆至千人，衣幟皆赤，與劉六等合掠壺關縣之趙村，大肆焚戮。藩王乞師，詔切責鎮巡官，令軍衛有司失

事者俱停俸帶罪殺賊

預見明史本紀是月山西盜起證之實錄在是月癸未諸書以

其與劉六等合不備載今據實錄增

南京十三道御史周朝佐等上言

三事一重操江謂長江之險武事日弛若徐鳳之盜猝突而南九江之盜順流而東何以備之請敕操江都御史及總兵官慎選久任之士卒俾練習舟師一選官軍謂南京操備軍士壯者占役私門老弱濫充行伍其把總管隊官又皆非將材乞令南京兵部會科道官閱選有例外多占軍伍投充勢要者太監總兵而下悉令指實劾奏一嚴守備謂南京城中盜出入自如往歲有盜洪武門金獸環者守衛之疎可知矣乞令各城門守臣

嚴加戒備有私役賣放者據實重處詔下所司依議行之
己丑江津賊曹甫餘黨方四等以正月之敗遁走
綦江旋流入貴州之思南石阡等府不受撫與花水盜
任倖舟合聚衆至二千人號萬人勢復振官軍與戰不
利踰月遂陷婺川龍泉坪焚烏江屯寨四十巡撫湖廣
都御史陳鎬奏調永順保靖土兵征之 甲午霸州賊
楊虎等自河南至山西由山西十八盤山還破武安縣
毀臨洛關掠威曲周武城清河故城等縣及景州東西
關由淮鎮店渡河直入文安與劉六等合六七等自湖
廣江西仍由故道入長清齊河等縣直抵霸州所至縱

橫如蹈無人之境時都指揮桑玉迎勦與劉六劉七遇于文安村中六七匿民家樓上欲自刎玉素受賊賂故緩之有頃齊彥名持大刀殺傷官軍數十人直至樓下大呼救兵至六七遂彎弓注矢出射殺數人去守臣請益兵詔署都督同知張俊充副總兵率京營兵千人援之乙未江西華林山盜陳福一等攻陷瑞州府指揮通判皆先期遁詔陳金分兵捕之戊戌巡撫陝西都御史藍章奏請撫四川賊先是湖廣永順土兵敗賊于陝西之石泉藍廷瑞遂走漢中都指揮金冕圍之食竭力盡時章統兵駐漢中廷瑞遣其黨何虎等詣章乞還

川就撫章以廷瑞本川賊恐急之必致死陝且受患遂

令冕護之出境至是以聞兵部以為非策且令總制填

巡官會議便宜行之

預異明史紀事本末藍賊請撫在六月與實錄合而所載六月十四

十五十六日之事皆誤也實錄據藍章奏至之日系之戊戌而賊之請撫又在其前今以為藍賊約期出降延

至六月十四日始至信地因已舛誤而至謂十五日廷瑞結昏于永順土舍彭世麟冀得聞逸去世麟倖受之

密以白鍾鍾授方畧使圖之遂以十六日禽藍耶等此尤誤也鍾等之禽二賊事在八月明史本紀及實錄皆

同而實錄記其請降以後之事皆在七八月間則紀事之明著日分必有脫誤所謂六月十五十六等日者恐

即八月誤八為六耳今據正史

是月起右副都御史周南巡撫南贛

汀漳等處先是守臣奏其地四省接境盜賊出沒宜仍

設巡撫官以統治之故有是命

預異明史周南本傳言巡撫之設自南始誤也

南嶺設巡撫始于宏治十年見職官志中後復裁之至是又請設實錄所載甚明今據之 秋七月

丁巳賊陷棗強縣知縣段豸死之先是賊薄城豸率衆捍禦斬賊二百餘人賊首一人賊怒攻圍益急越三日城陷豸身中數矢一鎗猶瞑目奮呼曰殺賊殺賊知不可爲乃赴水死賊怒殺其爲首者遂屠其城死者四千八百餘人絕者五十餘家時參將宋振駐兵縣東門與賊對語不發一矢賊尋引去事聞贈豸太僕少卿錄其子科道交劾振詔令戴罪自贖 壬申劉六劉七楊虎等合犯文安密邇近郊京師戒嚴癸酉兵部尙書何鑑以盜賊縱橫非京營軍所能制延綏二鎮游奇兵多邇

來邊警稍緩請調副總兵許泰馮禎遊擊將軍卻永各領所部泰永千人由居庸關至涿州禎千五百人由紫荆關至保定聽提督官調遣從之調邊兵討賊自此始是時又有賊二三千人自稱劉六攻破南宮縣執知縣孫承祖燬縣治放獄囚又掠甯晉皇莊事聞兵部請停二縣掌印巡捕官俸責限滅賊且許招募土兵立功陞賞毋爲賊用從之是日太白晝見踰月方止凡十二日乙亥盜攻江西臨江府破之總制副都御史陳金前請調兩廣土兵未至詔復趣之八月己卯命兵部侍郎陸完兼右僉都御史提督軍務統宣府延綏及京

營官軍勦直隸山東河南之賊時馬中錫師久無功兵部尙書何鑑劾其玩寇奏遣完代之故有是命總制都御史洪鍾巡撫四川都御史林俊禽斬四川盜首藍廷瑞鄢本恕及其黨二十八人初廷瑞等倡亂蜀中二三年間烏合十餘萬人偕號稱王置四十八營攻城殺長吏流毒三省俊及鍾連年征討不克及賊爲湖南土兵所敗走漢中求撫巡撫藍章遣人護之還蜀鍾傳令至東鄉聽撫而賊意在緩師遷延累月依山結營要求營山縣或臨江市屯其衆要官爲質鍾令漢中通判羅賢入其營本恕來謁約既定會官軍有殺其樵採者賊

復疑懼遂殺賢剽如故欲乘間脫走官軍爲七壘守之
不得逸廷瑞乃以所掠子女詐爲己女結昏于永順土
舍彭世麟世麟佯諾之密白鍾鍾授方畧使圖之及期
廷瑞本恕暨其黨王金珠等二十八人皆來會伏發悉
就禽惟廖麻子得脫其衆聞變驚潰渡河鍾遣兵追擊
俘斬七百餘人于是鍾俊及藍章各以捷聞得旨陞賞
賜敕獎勵國史本紀系之八月己卯寅朔己卯乃八月二日也
紀事本末以爲六月十五六等日者不特甲申陸完
出師至涿州忽報賊犯固安上召李東陽楊廷和梁儲
至左順門問曰賊在東師乃西出恐緩不及事宜令兵

部追還陸完使東出東陽等曰甚當但恐官軍在北賊若南奔益不可制上曰張俊等皆在南料亦無害東陽復奏曰願朝廷賞罰嚴明諸將効力必有成功上頷之丙戌召總兵官張偉都御史馬中錫還中錫書生不習兵事偉亦執絢子見賊強諸將怯度不能破賊乃議招撫謂盜本良民由中官貪黷所激若推誠待之可不戰降遂下令賊所在勿捕過勿邀擊餓渴則食飲之降者待以不死賊聞欲就撫相戒毋焚掠猶豫未定尋朝議調宣府延綏兵中錫欲戰則兵未集欲撫則賊時反覆終不得要領旣建議主撫不能變會劉六等聞邊兵

且至退屯德州桑園中錫與入其營開誠予之酒食慰諭之衆拜且泣送馬爲壽六慷慨請降七乃仰天咨嗟曰騎虎不得下今奄臣柄國人所知也馬都堂能自主乎遂罷會而是時方詔懸賞格購賊六等偵知之益疑懼徑去焚掠如故獨至故城戒毋犯馬都堂家由是中錫謗大起謂其以家故縱賊言官交劾之下詔切責中錫猶堅持其說以請兵部尙書何鑑謂賊誠解甲則貰死卽不然毋爲所誑旣而六等終不降乃遣陸完代之乙巳下都御史馬中錫惠安伯張偉于獄以六科十三道先後劾之也下法司鞫問皆論死中錫死獄中偉

革爵初中錫受命討賊大學士楊一清曰彼文士耳不

足任也竟無功

攷熙明史恩澤表偉無革爵事以嘉靖十四年卒贈太師謚康靖或以外戚故

旋革旋復耳實錄亦云革太保祿米閒住今據明史中錫傳書之

九月己酉流賊楊

虎等二千餘人攻滄州奪船爲浮橋列兵圍之數重知州張奇鹽運使楊遂等分城守禦焚其橋圍三日不克會浙江解兵器至以弓弩藥矢焚賊攻城梯具劉六劉七中流矢走先是六等倡亂官兵望風先遁至是副總兵許泰游擊將軍卻永等兵出霸州平口迎戰斬數百人賊始懼南奔于是天津指揮賀勇等遏之于信安鎮又敗之泰復追擊于東光半壁店禽斬二百七十餘人

永再破之景州鑑橋集未幾馮禎破之于阜城卻永破之于棗強永又會泰敗之于叁老集及薛官屯皆楊虎黨也餘賊東奔皆從劉六于是勢復熾 庚申四川賊藍郢餘黨復自陝西漢中流入甯羌州沔縣等處遂及畧陽徽州成縣皆破之指揮王韶屯沔不敢出徽州知州成縣知縣皆不戰而遁畧陽扶風知縣敗而遁千戶侯爵百戶瓦剌舍人郭玘等皆死焉先是任扶風知縣者爲孫璽巡撫藍章以畧陽爲漢中要地舊無城檄璽往城之工未竣賊至縣令嚴順欲遁璽拔刀斫坐几曰欲去者視此乃率僚屬堅守數日城陷璽被執大罵不

屈賊穢殺之順遁去誣璽俱逃溺于江以他人尸敘璽

子紹相訟于朝稱其父拒守凡五日力屈而死盜投之

江中下巡按覈實如紹相言踰年方賜贈卹

致興事見明史忠義

傳在是年今彙記于癸亥命都指揮張勇充副總兵

官赴江西勦賊先是陳金以兩廣土兵將至議調參將

金堂及勇統之至是以兩廣多賊堂分守潯梧不可去

乃以勇統兵別設把總二人丙寅陸完請益兵詔再

調宣府及遼東兵給之己巳廣東流賊三千餘人入

江西永豐縣

此吉安府所屬縣

知縣朱璉逃去遂破樂安新淦

參政趙士賢及知縣皆被執士賢吏走臨江索銀贖之

仍敕陳金樞調兩廣土兵分道勦捕 是月四川賊方
四等復攻江津林俊督酉陽播州石砭等兵分三道擊
破之尋遣人招撫不從翌日副使李鉞分兵爲六哨四
面蹙之破其中堅禽賊首任鬍子等賊大敗追殺三十
餘里斬首一千八百餘級生禽方四妻妾未幾賊見官
兵少還擊殺千戶田宣冉廷質等方四妻妾復逸去遂
率餘賊二千餘人遁入思南境內 冬十月癸未流賊
入山東長山縣典史李暹與戰殺數十人中流矢卒
甲申賊劉六等攻濟甯州不克焚糧艘千二百有奇陸
完遣張俊往援運船不及遂與漕運總兵鎮遠侯顧仕

隆都御史張縉及濟甯州衛官俱被劾詔俱停俸帶罪
自贖 丙戌劉六寇曹州屯裴子巖馮禎卻永等迎戰
斬首三百餘級又追至集北禽斬千八百餘人又獲賊
首朱千戶餘黨遂遁 丁酉小王子犯陝西山丹境都
指揮張鵬擊却之尋犯甘州副總兵白琮與戰于黑柴
溝斬首百六十三級獲馬駝牛騾甚衆賜敕獎勵 戊
戌賊方四等四千餘人自貴州石阡踰馬腦關復入四
川綦江縣陷之百戶柳芳義官曹騰皆戰沒巡撫林俊
奏調總兵楊宏都御史高崇熙會勦從之 是月太監
張永奉敕揀選團營官軍得十二萬三千七百有奇永

請于將臺下精選六十萬爲正兵又每營各選三千爲
奇兵共四萬二千人隨時操練以備調遣提督軍務
侍郎陸完奏賊千餘人自宿遷渡河攻虹縣去鳳陽皇
陵不遠而賊劉六等在沂莒間京邊兵少不能兩援請
救河南都御史鄧璋直隸都御史張縉會兵防禦南直
隸京操班軍亦宜留守詔從之仍令完度賊勢緩急別
議調軍十一月庚戌命太監谷大用提督軍務伏羌
伯毛銳充總兵官統領京軍五千人會陸完討賊時完
奏邊兵屢捷大用謂賊可卽平故謀督軍以出冀亦如
宣夏論功也

張異谷大用毛銳領京軍明史本紀所載
月日與實錄合明史紀事本末系之八月

誤也憲章錄系之十月亦非今据本紀實錄王夫之
出諸書皆以此事非書生所能辨惟實錄謂完討賊屢
捷大用等亦欲如甯夏論功
故有是請此得其實今据之 丙辰命戶部侍郎叢蘭

振濟南直隸及河南南京戶部侍郎王瓊振濟北直隸
及山東時各省災祲被寇給事中張澗等奏請發帑分
振戶部覆奏四川江西等處令巡撫督有司振之南北
直隸山東河南特遣二人遂有是命蘭奉使未至而河
北賊自宿遷渡河將逼鳳陽乃命蘭以本官巡視廬鳳
滁和兼理振事 巡撫四川右都御史林俊致仕俊在
軍與總制洪鍾議多左而中貴子弟欲冒軍功者輒爲
所格御史俞繼走避賊而僉事吳景戰沒繼慙欲委罪

于俊遂劾俊累報首功賊終不滅加以鑿井毀寺逐僧

徒迫為賊于是俊前後被切責會藍鄆二賊就禽方四

屢敗俊辭加秩及賞乞以舊職歸田詔不許辭秩仍聽

致仕言官交請留不報俊歸士民號哭追送明史俊傳

特書云時正德六年十一月也證之實錄在十一月丙辰憲章錄系之八月乃平藍鄆二賊之月俊之加秩蓋

在其後紀事本末系之九月亦誤也今据本傳及實錄戊午京師地震保定河

間二府薊州及畿南八縣三衛同日震皆有聲如雷動

搖居民房屋霸州尤甚三日中十有九震又山東武定

州亦同日震政異明史五行志但言八縣三衛證之實錄八縣則長興房山固安安寶坻永清

交安大城也三衛則萬全懷來隆慶也十九次實錄作十次又志言山東武定州亦同日震蓋實錄所書皆畿

輔也今仍据
明史志書之

辛酉詔百官修省。乙亥命用兵所在

瘞暴骸。十二月丁丑小王子犯宣府龍門所守備趙

瑛都指揮王繼死之。己丑以旱災免浙江長興天台

等六縣暨昌國衛稅糧。癸巳以禮部尙書費宏兼文

淵閣大學士預機務。是秋宏自侍郎進尙書上耽于逸

樂早朝日講俱罷宏上疏切諫報聞而已。及是劉忠致

仕遂以宏代宏既入閣以禮部侍郎傅珪爲本部尙書

尋進楊一清少保兼太子太保一清固辭不許。甲午

黃河清自清河口至柳鋪九十餘里自是至丙申凡三

日。辛丑四川賊麻六兒等自陝復入川刦掠兵備副

使馮傑率兵追擊于蒼溪縣之鐵山關敗績死之

馮傑異

戰役于鐵山關據實錄在是年十二月辛丑又系之于七年正月癸亥蓋因奏報至而複記也今據實錄六年

月是月以總理河道右副都御史張鳳巡撫山東仍

兼河道右副都御史彭澤巡撫直隸保定等府以旱

雹災免陝西慶陽西安等府稅糧是冬谷大用等出

師見賊勢方熾駐臨清不敢進劉六尙在山東而楊虎

陷宿遷執淮安知府劉祥靈壁知縣陳伯安連陷虹永

城虞城夏邑及歸德州邊兵追及賊退至小黃河口百

戶夏時設伏蹙之虎溺死餘賊奔河南復推劉三名惠

者爲首大敗副總兵白玉軍攻陷沈丘縣丞杜斌死之

殺都指揮王保執都指揮潘翀射殺河南布政司經歷
任傑北陷鹿邑有黨陳翰者與甯龍謀奉惠爲奉天征
討大元帥趙鐵副之翰自爲侍謀軍國元帥府長史與
龍立東西二廠治事分其軍爲二十八營以應列宿各
置都督聚衆至十三萬欲歧出以牽制官軍于是惠鐵
擾河南劉六兄弟及齊彥名等擾山東黨分爲二已而
劉六復轉而北卻永敗之濰縣還走霸州會上以明年
正月有事南郊舊制以十二月朔省牲于是賊謀以是
日乘間犯駕尙書何鑑奏聞亟召陸完赴援卽夜嚴設
守備厥明鑑請上早出安人心遂成禮退賊知有備西

掠保定諸州縣以去完擊破之文安賊南至湯陰完又督諸將追敗之先後俘斬千人 劉七之入山東也所過州縣率閉城守或棄城遁或遺之芻粟弓馬乞賊勿攻先後破者九十餘城惟樂陵知縣許達慨然爲戰守計縣初無城督民版築不踰月城成令民屋外築牆牆高踰簷啟圭竇纔容人家選一壯者執刃伺竇內餘皆入隊伍日視旗爲號違者軍法從事又募死士伏巷中洞開城門賊果至旗舉伏發竇中人皆出賊大驚擾斬獲無遺後數犯數却之遂相戒不敢近事聞進秩二等同時知縣能抗賊者益都則牛鸞鄒城則唐龍汶上則

左經濬縣則陳滯然所當賊少而達屢禦大賊有功遂

與鸞俱超擢兵備僉事其抗節不屈而死者則登州通

判邵章萊陽縣丞陳韜萊蕪知縣熊驂主簿韓瑋也

熊驂韓瑋見明史忠義傳據實錄七年正月贈登州府通判邵章爲知府萊陽縣丞陳韜爲州判各賜祭一壇

一人當亦在是年賊之擾河南也上蔡知縣霍恩與

典史梁達共守賊至恩語妻劉曰脫有急汝若何劉誓

同死乃築臺廨後約曰見我下城卽賊入矣及城陷恩

拔刀下城劉臺上見之卽縊未絕以簪刺心死恩被執

賊脅之跪罵曰吾此膝豈爲賊屈乎賊曰殺人以懾之

罵益厲賊以刀抉其口支解之達自經死西平知縣王

佐聞賊起練民兵爲守具拒賊于城上手殺數十人矢斃其渠帥賊忿急攻三日佐力竭被執罵不絕口賊懸諸竿殺而支解之縣丞毛繡亦遇害葉縣知縣唐天恩賊至與其父政等七人俱死永城知縣王鼎城陷繫印于肘端坐待賊不屈死裕州同知郁采與都指揮詹濟鄉官任賢共堅守斬獲多城陷被執采罵不輟賊碎其輔頰而死濟亦不屈死賢嘗爲御史方里居招邑子三千人拒守罵賊死一家死者十三人西華知縣李景拒賊死教諭孔環自來安知縣爲劉瑾黨所陷左遷是職賊陷西華環被執賊曰呼我王卽釋環厲聲曰我恨不

得碎汝萬段肯媚汝求活耶遂被殺固始丞曾基被執
使馭馬不從遇害夏邑丞安宣方之官聞賊至或勸勿
往宣兼程進抵任七日賊大至拒守有功城陷死之息
縣主簿邢祥已致仕城陷罵賊死時又有鹽運使同知
徐天英封御史朱紀皆以守城被害又陣亡指揮景瑞
等三十三人皆不得其月日其賊擾南畿抗節而死者
則靈壁主簿蔣賢指揮同知梁文也致異此所載死事
諸人皆是年河南
山東被擾前後事並据明史忠義傳又西華知
縣李景及徐天英以下三人皆据三編補入
七年春正月甲寅賊復犯潞州京師戒嚴兵部尚書何
鑑請敕陸完及谷大用毛銳還禦近畿其分擾山東之

賊責之邊將許泰卻永劉暉李鉉河南之賊責之邊將
馮順時源神周金輔周英子也 丁巳賊入大城縣知
縣張汝舟與主簿李銓迎戰不克皆死之汝舟子策與
故典史張俊之子信生員楊思恭醫士孫堂同遇害詔
分別賜贈卹攷異據明史本紀及忠義傳惟載主簿李
銓與汝舟同戰死其汝舟子策以下四人
皆據實 已未大祀南郊是時賊方敗于湯陰北走交
緣增

河遣京師團營分布近畿又調遼東兵至屆期成禮而

還 癸亥賊自安肅博野攻蠡縣遂至臨城主簿張俊

率兵拒之斬其酋一人遂遇害詔從重褒卹

攷異張俊
死事明史

不載此亦據實錄增此與大城典史
之張俊似非一人蓋姓名偶同耳

是月兵部奏議

平賊賞格各官軍能用命禽斬賊三名賞加一級獲賊
首一人者授世襲正千戶賞銀千兩其將領亦陞三級
賞如之有能禽滅劉六楊虎之等者如甯夏例待以封
爵無所吝報可是時賊黨雖衆多脅從者其精銳不過
千餘人自兵部首功令下官軍追賊賊輒驅良民當之
急則棄所掠逸去官兵所殺皆良民故捷書屢奏而賊
勢不衰 伏羌伯毛銳勦近畿之賊會賊自臨城出遇
于長垣銳與戰大敗谷大用擁衆觀望不敢進銳率師
至真定復大敗身被傷失將印會許泰援兵至銳僅以
身免言官交章劾乃與谷大用竝召還

攷異事見明史
毛忠傳特費于

是年之正月而實錄不載
諸書亦系之正月今從之

二月丁丑以咸甯伯仇鉞

爲平賊將軍偕副都御史彭澤提督軍務討河南賊太

監陸閻監軍時河南賊劉惠趙鏐等連破州縣親王守

臣告急日至乃以命鉞兵部會議請以文臣一人提督

討賊事澤方擢右副都御史巡撫保定未行復有是命

澤陳便宜十一事厚賞峻罰以激勸將吏從之 己卯

賊陷利津 山東賊犯萊州界指揮僉事蔡顯率兵禦

之不克與其三子洪英順同力戰死舍人劉勲劉仲武

臣等皆殉焉詔贈顯父子宫卹其家

及異事見明史忠義傳惟據實錄有

舍人劉勲以下
三人今據增

丙申副總兵時源敗河南之賊于陽

武斬首三百七十餘級 是月四川賊方四等復入川
南陳金以兩廣土兵至先議勦東鄉之賊遣參議徐蕃
等分屯要害 三月丙午朔巡按山東御史張璠言山
東生民被害已極賊之自北而東也則由樂陵海豐壽
光安丘以入青州其自南而西也則由莒沂滕嶧以趨
東兗縱橫荼毒朝廷命將出師宵旰不遑而渠魁未殲
徒黨愈熾一月而兩超鸚州震動畿輔者其害有三一
曰蠲征無實今賊徒被脅自首者得免糧稅三年而瘡
夷溝壑之民迫于官司以辦公家之稅不早停免是爲
盜毆民也一曰冗兵太多今奏帶將士皆膏粱遊子未

經戰陣遇賊輒藉邊兵以自衛而邊兵有功輒怙勢而奪之何以服人心而一軍令一日事權不一今總督提督互相是非發謀命將經宿而後定故機事泄而功不成其言皆切中時弊詔下所司議行 己未賊陷碭山蕭睢甯等縣睢甯主簿金聲邱紳義士朱用之皆力戰死之 辛未副總兵時源敗績于河南都督僉事馮禎死之先是劉惠趙鏐連陷河南南州縣駐師西平會詔仇鉞彭澤出師又以河南之賊專責之禎源等于是禎源會參將神周金輔敗惠鏐于西平賊奔入城官軍塞其門乘夜焚死千餘人斬馘甚衆餘賊潰而西時仇鉞彭

澤等尙未至巡撫鄧璋等以爲賊不足患朝崇王于汝
甯宴飲連日賊招散亡陷鄆陵萊陽汜水鞏遂圍河南
府三日諸軍始集賊屯洛南覘官軍饑疲迎戰右哨金
輔不敢渡洛禎及源周方陣而後哨參將姚信所部京
軍先馳失利遽遁還陣亂賊乘之禎下馬殊死戰援絕
死焉由是賊勢復張禎殉難之地明年是日風霾大作
又明年亦如之敕有司建祠歲以死日致祭 夏四月
丙子太監谷大用奏請陞賞陸完許泰等下兵部議以
四方盜賊蠭起雖捷書屢奏而賊首未禽宜通俟功成
之日奏請定奪其有功者且令紀功官勘實以聞于是

僅賜大用敕獎勵時大用召還慙于無功故有此奏

甲申以水災免淮安府稅糧十六萬石 戊子振畿內

山東饑又發通州天津德州臨清四倉米二十萬石遣

侍郎王瓊會各巡撫官振之 是月副都御史彭澤至

軍引見諸將校責以畏縮當死諸將校股栗伏罪久乃

釋之遂下令鼓行薄賊是時賊聞澤至乘夜奔汝州官

軍扼之于要害賊乃走寶豐復由舞陽遂平轉掠汝州

東南敗奔固始屯朱臯鎮 五月丙午劉六等自山東

敗于勝嶧乃奔東萊總制陸完師次平度州令游擊卻

永參將溫恭等迎勦副總兵許泰軍萊陽策應敗賊于

古城集東復令指揮傅鏗張椿夾攻其左右賊大敗山
東遂平是時賊分爲二一西走騎兵追及之于淮河易
服而遁一復北走霸州犯香河寶坻玉田等縣殺參將
王杲于武清畿輔復震而賊復轉南至冠縣副總兵劉
暉連敗之遂奔邳州 戊申湖廣永順宣慰使彭明輔
及都指揮曹鵬等敗河南之賊于朱臯鎮賊倉卒渡河
溺死者二千人斬首八十餘級餘衆悉走光山 甲寅
陳金勦東鄉之賊令副總兵張勇士官岑猛等竝進連
敗之于赤岍蔭嶺等處禽徐仰三馘王鉅五等克柵二
百六十五斬首萬一千六百餘級俘七百五十餘人撫

州遂平移師姚源

攷異明史本紀系平東鄉賊于是月陳金傳則書二月蓋以二月進兵五

月始平故傳記移師姚源于五月是撫州之平在五月也今分書之

丁巳巡撫南贛都

御史周南討贛州大帽山賊平之先是南之任徵集江

西福建廣東三省兵督副使楊璋僉事凌相指揮孫堂

義民林富等分道進剿江西總制陳金亦遣兵來助至

是江西兵自安遠入克其砦七廣東兵自程鄉入亦克

七砦福建兵自武平入克其砦八禽斬賊渠何積欽劉

隆李四仔張時旺等先後斬獲五千人遂平贛州南乃

移師會金討賊于撫州

攷異諸書皆系平大帽山賊于正月而三編目中則云平東鄉

之前一月是四月也明書本紀据實錄而實錄多据奏報之月日且撫州賊平在前而此言周南移師會討撫

州之賊是平大帽山之賊又當在前三編所
記未爲誤也今仍據實錄書之而增識于此

丙寅盜

殺總督南京糧儲都御史馬炳然于武昌江中時劉七
等五百餘人自邳州南渡抵固始聞劉六等敗于河南
遂走湖廣由團風鎮奪船十三艘溯流至夏口炳然自
蜀攜家赴南京道遇賊詐稱胥吏來迎遂登舟殺炳然
投之于江其妾吳氏亦自沈死已賊焚劫漢口指揮蒲
弼等追及之禽斬六十餘人其中箭溺水死獲其尸
卽劉六及其子仲淮也 閏月戊寅山東餘賊陷濰縣
時楊虎已死其妻崔氏曰楊寡婦者率千騎犯境指揮
喬剛禦之賊少却僉事許達復追敗之于高苑令指揮

張勛邀之于滄州米家屯凡俘斬二百七十餘人

明史

紀事本末作陷利津今

已卯獲四川賊方四磔于市

據實錄係維縣從之

四破綦江僉事馬昊率土兵敗之犇婺川復劫梁山縣
與曹甫不協相攻衆遂散四變姓名潛逃開縣義官李
清獲之遂伏誅四之畧梁山也時梁山主簿時植攝縣
事賊至拒却之斬獲數十級踰月復至相拒數日城陷
賊說之降不屈脅取其印不予大罵被殺妻賈聞變卽
自縊女九歲赴火死詔贈植表其妻女曰貞烈 方四
之亂士民之冒死殺賊者有梁山諸生趙趣同友人黃
甲李鳳何璟蕭銳徐宣楊茂寬趙采誓死拒守城陷皆

死都御史林俊嘉其義立祠祀之又有徐敬之者亦梁山人眾推爲部長以拒賊陷陣死雷應通嘉州人與賊戰于百丈關父子七人倡義死戰被執俱慷慨就殺袁璋江南人素以勇俠聞林俊委勦賊所在有功後爲賊執其子襲挺身救之連殺七賊亦被執俱死襲死三日兩目猶瞋視其父俊表其門曰父子忠烈 甲申咸甯伯仇鉞追擊河南之賊于光山遣諸將神周姚信時源金輔左右夾擊大敗之斬首千四百有奇盜衆潰奔六安 己丑北部伊畢喇伊木等寇甘肅指揮王杲等擊却之 壬辰仇鉞彭澤等討河南賊平之先是賊敗于

光山會湖廣軍亦敗其別部賈勉兒于羅田賊沿途潰散自六安陷舒城復還光山至商城官軍追之急賊復南攻六安將陷時源等涉河進敗之七里岡賊趨廬州至定遠西又敗還至六安分其衆爲二劉惠與趙鏐二弟鏐鎬率萬餘人北走商城而鏐道遇其徒張通及楊虎遺黨數千人勢復振掠鳳陽陷泗宿睢甯定遠于是澤與鏐計使神周追鏐時源金輔追惠姚信追勉兒勉兒復與鏐合信連敗之宿州追奔至應山其衆畧盡鏐薙髮懷度牒潛至江夏飯村店軍士趙成執送京師伏誅輔追劉惠連戰皆捷惠窘走南召指揮王謹追及于

土地嶺射中惠左目自縊死勉兒亦爲都指揮夏廣所
敗獲之項城餘黨皆先後被禽凡出師四月而河南賊
悉平 趙鏐之起也稍有智計定爲部伍勸其黨無妄
殺移檄府縣約官吏師儒毋走避迎者安堵由是以風
子名橫行中原勢出劉六等上嘗攻鈞州五日以馬文
升家在州中舍之去有司遣人齎招撫榜至鏐具疏附
奏言今權奸在朝舞弄神器濁亂海內誅僂諫臣屏棄
元老舉動若此未有不亡國者乞陛下睿謀獨斷梟羣
奸之首以謝天下卽梟臣之首以謝羣奸蓋其桀黠如
此攷異河南賊平明史本紀系之是月甲申據實錄也
趙鏐之入鈞州諸書或系之去年之冬或系之今年

之春蓋與入泌陽焦芳家皆同時事而明史仇鉞傳謂鉞攻釣州以馬文升方家居舍之去此沿野史之誤也野史皆云馬文升卒于七年正趙錢入釣州傳聞以爲是時文升尙在不知文升卒于五年六月霸州盜起于十月故王弇州攷定國史以糾皇明通紀憲章諸書之誤明史馬文升傳亦記其卒于五年是與仇鉞傳中文升方家居之說自相矛盾蓋沿野史書之未及更正耳今但云文升家在釣州爲得其實 六月癸卯四川賊方四餘黨奔甯羌遂犯沔縣官兵擊敗之追至老馬山賊與苗蠻合千戶黃虎死之 丁巳劉七等自武昌黃州下九江經安慶太平儀真以達鎮江所過殘掠南京守臣奏乞增兵防禦廷議鎮江四達之地東南抵浙江西北抵山東逆流而上抵湖廣沿江而下則濱海傍江均宜防守請敕彭澤仇鉞統兵自湖廣而下

駐南京以東陸完自山東淮揚而南駐蘇常浙江便地
督操江坐營鎮巡及備倭巡海兵備三司府衛等官水
陸巡防分守要害以防窮寇北潰從之 壬戌黑酋見
初自河間順德二府及涿州夜出傷人有至死者尋見
于京師形兼赤黑大者如犬小者如猫若風行有聲居
民夜持刁斗相警達旦不敢寢踰月乃息後又見于河
南封丘縣 乙丑戶部侍郎王瓊奉命振北直隸山東
被寇者時順天河間保定真定大名廣平六府及山東
濟南青兗登萊東昌被賊殺斃男婦六萬五千有奇陣
亡官軍民快人等一千五百有奇詔俱恤其家 丁卯

南京御史周朝佐等奏賊以犇敗餘孽自湖廣越黃州下九江抵鎮江其舟不過十三衆不過五百而豕突縱橫如入無人之境操江都御史陳世良武靖伯趙安澤宜如馬中錫張偉例械繫京師別簡才能大臣代之兵部亦請如奏上不許仍令世良等戴罪自効 秋七月丁丑四川賊陳二等降陳二卽曹甫也時副使馬昊偕總兵官楊宏副使張敏等分擊賊于營山蓬州等處斬千三百餘人賊勢大蹙總制尙書洪鍾乃遣人分詣賊營撫諭敏單騎入甫營甫聽命而廖麻子忿甫背已殺之并其衆敏被拘留旣而送還然是役也甫黨散者幾

二萬人廖麻子收甫餘衆復轉掠川東官兵仍不敢擊
潛蹣賊後蔽良民爲功士兵虐尤甚民間謠曰賊如梳
官軍如篦士兵如髯言愈搜愈密也論者咸歸咎鍾之
不能戢下云 贈卹四川陣亡官軍其死事之都指揮
樊煜推官吳伯鈞各贈二級賜祭一壇 初河南虞城
訓導圻琮以守城禦賊被害至是其子自勝陳奏令贈
卹如例 戊寅以副總兵劉暉時源郤永李鉉俱充總
兵官分守山東河南南北直隸時河南南山東已平令各
率所部千人仍于各部選留五千人屬之假以總兵名
目暫留填守仍聽提督官征調 壬午罷陳世良趙宏

澤以副都御史俞諫懷甯侯孫應爵代督操江事 癸

未吏部奏請起致仕尙書劉大夏韓文等詔大夏等已

復職致仕勿復言 癸巳江西按察司副使周憲討賊

于華林敗績死之初賊累敗食盡憲連破賊于仙女雞

公嶺斬獲千餘人乘勝進攻北門三戰賊少却憲與子

幹先登蹴之賊下木石如雨憲中鎗顛幹前救父力戰

墜厓死憲創重被執罵不絕口賊怒支解之事聞贈憲

按察使幹陞二級令有司旌其門曰孝烈 丁酉振四

川饑 是月山東殘賊自冠縣劫朝城大同指揮謝琴

率兵追之斬首七級力戰而死時流賊雖已敗犇間復

嘯聚少者百人多或千人甯陽鄒費臨邑高唐諸州縣

復遭蹂躪巡檢劉斌潘佑皆死之詔分別贈卹上以

黑書之異京城內外謠言迭起欲命谷大用仍舊提督

京校內外緝訪大學士李東陽力諫不納八月己酉

總制都御史陳金勦姚源洞賊平之初姚源賊殷勇士

洪瑞七鄒成七等復先後起積年猖獗金受總制之命

募鄉兵得五六萬人令叅政董朴吳廷舉等分營餘千

貫溪安仁鄱陽樂平遏其要害金親統軍搃其巢勇士

剝重死會副總兵張勇以土兵至毒弩射殺瑞七等俘

斬五千餘人金以捷聞時賊聞敗沿途潰散而土兵虐

而貪姚源敗賊賂之乘夜遁走貴溪延舉以土兵追及于弋陽賊復轉掠徽衛間金更假作賊僭號以張其功

朝廷不知賊首王浩八乞降竟許之

政異金平姚源賊事見明史本傳而

土兵受賄賊復逸去轉掠徽衛間皆見實錄今參書之

初劉七等賊在長江一

帶乘潮上下官兵所遇輒敗已而賊治舟孟瀆陸完等

至鎮江留仇鉞防守令溫恭以騎兵駐江北自督劉暉

卻永等以舟師趨江陰福山港七月十八日賊至通州

其夜颶風大作舟壞乃奔狼山二十一日完遣同知羅

瑋等爲鄉導率諸將登狼山列陣以戰賊敗奔山頂矢

石交下暉自山北永白山南皆蒙盾自蔽揮刃而上齊

彥名中鎔死劉七率其親信數十人下山謀奪小舟逸

官兵列岸擡矢射之七中矢溺水死餘黨殲焉霸州之

賊至是遂平歐陽實錄七月壬申朔八月壬寅朔而皇

支而系之八月明通紀紀事本末所叙日分皆係七月干

月而書八月癸亥者據奏至之月日也實錄所記七月

十八日賊至通州遇颶風及二十八日破賊狼山事皆

原奏月日至八月癸亥始奏至京師故據書之大氏實

錄所載多據奏報月日而破賊必在前一月兩月不等

諸書系之八月亦自不誤而所書丁丑壬辰等日丁丑

而七月初六日壬辰則七月二十一日是謬以七月之

干支繫之八月下此則其推麻之失詳也今仍姑實錄

書八月癸亥而別系破賊 癸亥陸完等以捷聞賜敕獎
月日于癸亥報捷之前
勦是役也以數盜橫行中原殺人滿野村市為墟喪亂
之慘百數十年所未有京軍再出無功乃調諸邊之兵

竭天下之力經三載賊以舍陸從舟困于暴風竇天賦其虐非專恃兵力所致云 是月江西增設東鄉縣于撫州府以臨川縣之孝岡又析金谿進賢餘干安仁四縣地置焉又增設萬年縣于饒州府以餘干縣之萬春鄉又析鄱陽樂平及貴溪三縣地置焉從總制都御史陳金請也

陳金請也日中系之九月平華林賊下明史地理志七年八月置則陳金任內事也實錄系九月乙酉陳金之八月庚午下今據書于八月之末

討華林賊平之先是副使周憲遇害于華林軍潰南昌知府李承勛單騎入憲營衆乃復集金卽檄承勛代之賊黨王奇聽撫搜其衷刃釋之置麾下奇感激誓死承

勛遣奇密入砦說降其黨約期爲內應至期承勛率銳卒五百人夜銜枚登山令奇前導歷重險抵賊壘羣賊方酣寢奇拔柵率衆入五百人大呼奮擊內應者起夾攻賊倉卒不知所爲四奔山谷尋斬賊渠羅光權及其黨胡雪二等華林遂平白金出兵勦東鄉甫八閱月破劇賊幾盡惟所用土兵貪殘嗜殺剽掠甚于賊有巨族數百口閭門罹害者所獲婦女率指爲賊屬載數千艘去民間謠曰土賊猶可土兵殺我金亦知民患之方倚以討賊不爲禁又不能持廉軍資頗私入士民皆深怨焉

戊子召總制四川軍務洪鍾還以彭澤在河南有

平賊功擢右都御史總制四川軍務代之鍾以不能戢
下爲巡按御史王綸紀功御史汪景芳所劾尋四川賊
自合州渡江陷銅梁榮昌等縣殺驛丞侯忠等直趨內
江遂甯諸州縣綸再劾之遂有是命鍾旣召還尋乞歸
丙申賜義子一百二十七人皆國姓初中官奴卒及
市井桀黠偶爲上所悅者輒收爲義子永壽伯朱德及
都督朱甯朱安爲首其次朱國朱福朱剛皆至都督餘
則授都指揮指揮千百戶鎮撫旗舍之等時有朱靜等
五人皆亡虜亦至于戶自後賜姓者日益多云 是月
狼山餘賊十二人奔入泰興主簿黃璉率兵追之爲賊

所殺贈知縣一冬十月戊申旌表直隸沙河縣生員王
得時等女王梅等十人王梅爲賊所奪欲汙之不從遂
支解之其九人則大名縣民李欽女王得山女錢雄女
駢珩妻王氏王表妻張氏黃縣民馮茂女李璫妻馮氏
魏縣民楊善妻劉氏及其女皆死于賊者也 甲子增
建豹房工部上言豹房之造迄今五年所費白金二十
四萬餘兩今又增修房屋二百餘間國乏民貧何以爲
繼乞卽停止或量減其半不聽 是月免河南江西浙
江被災及被寇者稅糧 以平賊功加陸完太子太保
時王鼎罷遂擢完都察院左都御史侍郎李士寶爲右

都御史 十一月壬申命填守河南總兵官時源佩平

賊將軍印充總兵官會總制彭澤討四川賊澤請之也

丁亥留宣府大同遼東兵于京營先是河南賊平兵

部議以仇鉞所部邊軍酌留三之一備賊餘悉遣還其

劉暉時源卻永李鉉分鎮山東河南等處亦令各留千

人餘亦遣還至是遼東宣府大同軍過闕賞勞上方好

弄兵時大同游擊江彬隸總兵官張俊赴調過薊州殺

一家二十餘人誣爲賊得賞嘗與賊戰于淮上被三矢

其一著面鏃出于耳坎之再戰上聞而壯之及還軍過

京師彬因錢甯得召上見其矢痕曰彬健乃爾邪彬狡

黠有力善騎射談兵上前上大悅遂與宣府守將許泰
皆留不遣擢彬都督僉事出入豹房同卧起寵在甯上
甯心忌之彬知甯不相容顧左右皆甯黨欲藉邊兵自
固因盛稱邊軍驍悍勝京軍請互調操練言官交章諫
閣臣李東陽疏陳十不便皆不省 是月太監張永罷
初永在御用監託以稽查令庫官吳紀等竊出銀七千
餘兩昇歸私宅至是御用監太監上聚發其事執紀等
下鎮撫司鞠治具得其實永多方營救乃調御用監閒
住 十二月丁卯大學士李東陽致仕東陽乞休前後
章數上至是因調邊兵力持不可上坐乾清門趣之東

明通鑑卷四十四

三

陽卒不奉詔翌日復以老病請許之賜敕給廩隸如故事
已巳巡按御史王綸等奏四川流賊廖麻子攻破
綿竹樂至金堂等縣都指揮許鳳西安衛指揮殷輔千
戶伊佐等十四人力戰死時洪鍾方召還彭澤未至巡
撫高崇熙懼怯主招撫麻子等陽受約崇熙遽許罷諸
軍令副使張敏徙開縣臨江市民空其地處之許給復
三年爲請于朝副使馬昊力爭謂臨江市上達重敘下
連湖湘地土饒衍奈何棄以資賊自貽患崇熙不從昊
乃益治兵以防其變是月免南畿山東山西陝西被
災寇者稅糧是冬祈雪

明通鑑卷四十五

江西永甯知縣當塗夏燮編輯

紀四十五

起昭陽作噩盡闕
逢掩茂凡二年

武宗毅皇帝

正德八年春正月癸酉以右副都御史俞諫代陳金討
江西賊初金及張勇討姚源之賊狼兵受賂縱賊復主
招撫賊渠王浩入陽聽約未幾復叛率五峒蠻兵與東
鄉賊分劫州縣言官交章劾金乃召金還 辛巳宣府
守臣奏送降虜托克托泰等舊作脫至京命充御馬監
勇士尙書何鑑等言漢魏徙氏羗于關中郭欽江統皆

勸晉武以蚤絕亂階苻堅處鮮卑于塞南苻融亦慮其
窺伺虛實以生邊患此既往之明驗也今使降虜出入
禁闕萬一結外寇以爲內奸將來之患可勿深慮仍乞
徙之遠方以杜後患不聽 韃靼小王子犯大同命宣
府延綏及山西諸鎮兵禦之 壬午大祀南郊 乙酉
以邊將江彬許泰分領京營皆賜國姓是時邊軍調集
京師而神周坐罪謫蜚緣入豹房復官已而復召劉暉
尋設勇士營周暉分領之又立東西兩官廳軍彬泰分
領之名四鎮兵又名外四家云 癸巳命戶部右侍郎
叢蘭以右僉都御史巡視西路自居庸關至龍泉右僉

都御史陳玉巡視東路自山海關至古北口以大同之
警故也 是月以旱災免陝西西安延安等府南直隸
鳳陽等府被災州縣稅糧 追卹狼山陣亡之石頭港
巡檢溫聰等三百九十二人 二月辛丑以四川賊復
熾罷總兵官楊宏時宏爲言官所劾遂繼洪鍾召還宏
怯懦寡謀數爲賊敗或傳其在德陽賊縛之樹而毆之
宏急示以印乃引去宏僅以身免士民多怨之竟免于
罪云 甲辰贈西安後衛指揮使雲海爲都指揮同知
初藍廷瑞等刦掠川陝海領兵與戰身先赴敵射殺數
十人賊圍之數重海提刀力戰而死至是奏聞始賜贈

卹 乙巳以浙江水災竈丁冬溺死者巡鹽御史林季瓊奏請免歲辦鹽課八千九百餘引仍令巡視都御史量爲振濟從之 丙午以平賊功封太監谷大用弟大亮陸闇姪永皆爲伯時大用等欲如甯夏例求封兵部執不可謂仇鉞獨建奇謀削平禍亂今羣賊殄滅乃諸將併力非一人之功且諸將如劉暉卻永時源皆出萬死一生而大亮永藉父兄之勢坐而得之其誰不解體上令再議兵部復請比朱甯例加陞至右都督而止仍不許尋內批竟封之賜誥券歲食祿千石 癸亥江西紀功給事中黎奭奏姚源賊王浩八等刼弋陽上饒等

縣尋入浙江開化境上時上命填守徐邳總兵官李鉉
協同俞諫提督江西軍務令統所部大同官軍一千人
副總兵李瑾統湖廣官軍二千人會勦詔俟俞諫及鉉
等至分道討之 三月戊子置鎮國府處宣府官軍

癸巳逮四川巡撫高崇熙至京師以廖麻子復叛也崇
熙既主撫遣張敬處賊于臨江市買田安置比敏至新
甯賊以爲誘已執之屠殺數百人言官劾崇熙不俟命
罷兵遂就逮尋調延綏兵千八百人以指揮同知杭雄
統之甯夏慶陽固靖三鎮兵共千五百人以署都指揮
僉事楊義統之仍聽彭澤時源節制擢馬昊四川巡撫

代崇熙

甲午以今春少雨風霾屢作令英國公張懋

祭告天地社稷敕百官修省 夏四月壬寅平鎮筰叛

苗初鎮筰五寨平頭烏羅等處苗賊龍童保龍麻陽等

連年構亂湖廣貴州填巡官調土漢各軍攻之禽麻陽

以歸至是都御史沈林總兵李昊率都指揮張泰等分

四路攻之破其砦禽童保等六十餘人平九十七寨捷

聞賜敕獎勵守臣請增設鎮筰守備一人從之 癸丑

姚源賊首王浩八等聚眾萬餘屯開化分掠婺源休甯

諸縣有章仁者故石埭諸生也少習妖書爲羣盜亡命

與浩八合詔巡按御史張縉購懸賞格有能禽斬浩八

仁及賊徒自禽斬以獻者俱授正千戶賞銀千兩 庚

申上御經筵以講官修撰何瑋語觸忌諱傳諭內閣欲

撻之閣臣楊廷和等委曲申救乃以舉止不恭謫爲開

州同知

攷異事具明史瑋傳而實錄謂其敝衣垢面言詞蹇澀幾不能終篇蓋修實錄者誤信中官傳

論之詞而是時江彬被寵瑋進講時必有指摘故史以爲觸忌諱者此實錄也今仍据本傳書之

亡

丑總制四川軍務彭澤等敗賊于劍州廖麻子之叛也

澤尙未至至是與總兵時源屢戰敗之麻子衆潰奔羅

江馬昊以五千騎與澤敗之游擊將軍閻勲追及于劍

州之青林口賊棄馬登山拒戰勲射而顛邊軍黃回兒

等爭撲之斬麻子首以捷聞旣而紀功給事中王萱言

勲之禽賊由龍州土官把事王臣實爲鄉導且用鐵爬擊仆之回兒等始爭取首級以去兵部請覆勘不許

是月副都御史俞諫督江西浙江福建諸軍討賊先是右參政吳廷舉從陳金破賊于姚源王浩八乞撫許之旣而復叛又有胡浩三者亦降而復叛廷舉乃以單騎入浩三營撫諭之爲所執廷舉居三月盡得其要領因識其左右有謀勇者陰結之使爲內應竟送廷舉歸賊之入開化也副使胡世甯僉事高賓以聽撫賊艾茹七等二百人爲新兵而茹七所過縱兵虜掠執安仁縣官氏二女欲汙之不屈俱赴水死給事中黎奭劾世甯等

竝及廷舉詔以廷舉方被拘執世甯亦討賊有勞令停
俸戴罪自贖會諫至與世甯畫討賊之策乃檄都指揮
白宏參將李隆與嘉興同知伍文定等分道進兵 五
月辛巳小王子犯大同由白羊口入掠平虜井坪乾河
等處官軍敗績于黃土嶺寇解去遂趨朔州犯馬邑巡
撫都御史高友等乞命將出師以彰天討詔咸甯侯仇
鉞充總兵官統京營軍六千人會填巡官禦之 癸巳
都御史俞諫等破姚源之賊先是賊屯開化諫檄白宏
與湖州知府黃衷軍馬金鎮李隆伍文定與僉事儲珊
都指揮江洪軍華埠賊黨劉昌三等衝入馬金破之執

宏軍士死者十餘人王浩八突華埠文定擊敗之斬汪
十二及其黨二十人隆珊追至池淮擣其巢斬首百七
十二級而江洪以奇兵深入賊伴敗走以金帛擲地衆
兵競取之賊遂反攻執洪及指揮張琳等文定等殿後
得還蔣抵華埠而是時賊勢亦衰遁歸江西德興以所
執宏洪等爲質求撫于按察使王秩秩受之爲傳送姚
源浩八等卒不降攷異姚源之賊王浩入爲首而吳廷
舉被執之賊爲胡浩三明史廷舉傳
可證而三編目中則云有賊渠胡浩三者廷舉往諭爲
所執是胡浩三亦浩八之黨而實二人紀事本末以爲
廷舉被執之賊卽王浩八固誤野史又有以爲胡浩八
者亦誤也池淮明史伍文定傳作地淮誤也實錄作池
淮三編質實云池淮溪名有二源一出歇嶺一出開化
縣西百里大榕嶺台流至縣西三十里滕巖下之池淮

版曰池淮溪皆本
之一統志今據之

六月戊戌朔河決黃陵岡廷議以
其地界大名山東河南守土官事權不一請崑遣重臣
乃命管河副都御史劉愷兼理其事愷奏率衆祭告河
神越二日河已南徙尙書李鏊因請祭河且賜愷羊酒
愷于治水束手無策特歸功于神曹單間被害日甚

庚子巡撫山東都御史趙璜奏霸州賊之亂曲阜縣治
被賊殘破而闕里庑廷又在曠野請移縣治就闕里并
爲一城庶易守從之 丙午給事中潘塤等復劾奏游
擊江彬討流賊次新河縣蘇添村不進乃殺其居民康
強等四十一人闕學等九人耦而耕又召而殺之都指

揮張銘亦于鉅鹿韓家塞殺耕夫趙五漢等二十八人
至隆平又殺六人以冒首功請行勘按治詔令彬等停
俸竟不之罪也 乙卯俞諫破賊于貴溪時王浩八等
至姚源仍不受撫復奔據貴溪之裴源山餘衆復集連
營十里諫檄按察使王秩副使胡世甯參政吳廷舉等
列屯要害斷其歸路躬與都督李鉉乘夜冒雨潛進大
破之俘斬數千人遂禽浩八捷聞賜敕獎勵然是時賊
黨潰走玉山而有司急于報功仍議招撫越兩月而勢
復熾 辛酉江西豐城縣西南隕火星如斗光赤明日
火起旣滅復作者累日焚官民廬舍二萬餘間死于火

者三十餘人戶部以火災異常請敕巡撫官查勘被火之家分別振之是月戶部尙書孫交禮部尙書傅珪皆致仕二人均以忤中官罷之也時征討流寇調度煩急加以歲凶正用不足交區畫必先其急者四方告饑輒請蠲振以故民不至甚敝而小人用事者皆不便之雲南填守中官張倫請采銀礦南京織造中官吳經奏費乏交皆力爭流寇之擾河南也太監陸閏謀督師監神鎰軍廷議莫敢先發珪厲聲曰師老民疲而賊日熾以冒功者多僨事者漏罰失將士心今賊橫行肘腋間民囂然思亂禍旦夕及宗社吾儕死不償責諸公安得

首鼠兩端由是議罷疏上竟遣閭而中官皆憾珪珪奏
災異言春秋二百四十二年災變六十九事今自去秋
來地震天鳴雹降星隕龍虎出見地裂山崩凡四十有
二而水旱不預焉災未有若是甚者極陳時弊十事語
多侵權倖權倖益深嫉之至是遂傳中旨與交同罷兩
京言官交章請留不省以戶部侍郎王瓊爲本部尙書
吏部左侍郎劉春爲禮部尙書 是夏北部額布勒舊作
亦卜剌與小王子仇殺初額布勒竄西海阿爾托蘇舊作
與之合逼脅洮西屬番屢入寇巡撫張翼不能制漸深
入至是擁衆來川遣使詣翼所乞邊地駐牧修貢翼陷

以金帛令遠徙額布勒遂西掠烏斯藏據之自是洮岷
松潘無甯歲 秋七月總制四川彭澤奏廖麻子之黨
有喻老人王長子等二百餘人自昭化渡江襲殺都指
揮姚震百戶周增轉入通巴利州判官曾璉并研主簿
張岐力戰過賊死之賊復謀趨陝越甯羌犯畧陽夜走
度廣元爲官軍所遏還趨通巴招餘黨總兵官陳珣不
敢擊詔逮珣且責馬昊刻期滅賊 八月丁酉免南畿
水災稅糧 戊戌總兵官仇鉞奏小王子等寇萬全衛
沙河境督參將昌佐等與戰斬首三級以捷聞時陣亡
官員二十餘人馬百四十餘匹論者謂是役也所失十

明通鑑卷四十五

八

倍所獲鉞威名以是頓減 庚子王浩八之黨劉昌三
蔡六二柳三十等奔據玉山縣之懷玉山寺列險屯柵
俞諫會巡撫南贛周南江西巡撫任漢都督李鉉等集
三省兵四路邀擊前後斬首二百餘級生禽五百餘人
昌三等走匿西源爲知縣陳攬所獲餘賊千餘復奔姚
源 壬寅追贈江西瑞金知縣萬琛爲光祿寺少卿初
琛知瑞金劇盜大至縣人洶洶逃竄有勸琛亟走者琛
斥之率民兵數十人相持至明日力屈被執罵不絕口
賊攢刺之乃死同時有廣昌知縣王祐者賊至民盡逃
援兵又不至祐拔刀自刳其腹曰有城不能守何生爲

左右奔奪其刀後援兵集賊稍退越七日復突至祐倉

皇赴敵死之事在宏治之末至是始得旨贈卹

見明史

忠義傳琛死事特書于宏治十八年之正月實錄紀于

是年之八月據請贈卹之年月書之也今據實錄仍追

記其死事于是月東鄉萬年之賊復起先是陳金所

撫東鄉賊隸胡世甯部下爲新兵以所過殘掠爲言官

所奏乃下令散遣于是賊艾茹七樂庚三等懼罪復叛

衆至二千餘入萬年界萬年雖立縣賊尙衆吏胥多賊

黨官府動息必知副使李情治峻急衆欲叛畏都督李

鉉在餘于不敢發會是月十六日宏疽發背卒于是萬

年縣賊王垂七胡念二等乘間起殺縣丞馬環主簿冬

禎典史孔卓于菱塘縱火毀公私廨宇殆盡遂殺情及
浙江督捕指揮邢世臣饒州通判陳達秦碧千戶許政
隸卒死者甚衆事聞命鎮守山東右都督劉暉往代鉉
預異實錄記李鉉卒于十月乙巳据奏報之月日也其
奏稱鉉以八月十六日疽發背卒于是萬年賊起云云
又据六月所載俞諫破貴溪之賊有司仍議招撫越兩
月而變復作卽指是月玉山東鄉萬年之役也又据明
史本紀十月丁未俞諫破賊于東鄉是實錄据其奏
捷之日追書之明矣今仍据奏報中語系之八月下
土爾番復據哈密初哈密巴爾濟之立也部人不順會
土爾番莽蘇爾嗣其弟展特穆爾尙在甘州宏治之末
莽蘇爾遣使求展特穆爾廷議持不可以甘州守臣言
送之還遂輸邊情于莽蘇爾于是莽蘇爾復有吞併哈

密之志而哈密巴爾濟心怵國人害已莽蘇爾因數以

甘言誘之至是巴爾濟竟棄其國奔土爾番莽蘇爾奪

其印遂遣和卓塔實鼎舊作大者他只丁據哈密次黑哈密土爾番事見宏

治十七十八兩年舊譯俱見二十五卷巴爾濟即拜牙郎莽蘇爾即滿速兒展特穆爾即真帖木兒也今悉據

三編目九月甲戌俞諫破賊于姚源致異此据明史稿在是月按史

姚源前作姚源此作桃源與地里志合先是姚源賊胡浩三送吳廷舉還其

黨不協浩三遂殺其兄浩二官軍乘間攻之諫遂會李

鉉督廷舉及參政王子言副使李情僉事李嘉言等合

勦禽浩三等俘斬四百餘人會徽州知府熊桂等亦破

賊于休甯婺源遂以捷聞 癸未以旱災免大同州縣

衛所夏稅之半又免河南開封等府睢陽等衛夏稅有
差 乙酉巡視江西右僉都御史王哲卒哲爲御史有
風裁巡按江西劾填守太監董讓怙勢驕縱諱盜不聞
擢臨清副使外夷來朝貢者私市鹽事發哲清沒入之
而返其直人稱得柔遠體及巡視江西病不能事事而
甯王宸濠屢以計去守臣不附已者哲自濠所宴飲歸
以病暴卒時以爲濠毒之云 攷異明所設巡按巡撫外
仍有撫治巡視名目但不
常設耳哲以正德五年三月巡視南贛而是時南贛巡
撫則周南江西巡撫則任漢似是時哲仍係巡視而諸
書及實錄皆作巡撫今仍据本紀五年所命巡視之官
書之再哲以宴歸暴卒實錄系之是年九月乙酉而据
明史孫燧傳言甯王惡哲不附已毒之
得疾踰年死與實錄小異增識于此
冬十月丁未

俞諫討東鄉賊平之先是艾茹七等之叛守臣匿不以聞臨川縣民陳琦等連章上愬且言茹七等各有窩主潛爲間諜不盡誅之亂無已時詔俞諫等相機撫勦至是諫遣參將桂勇李隆等分道進兵大敗之遂禽茹七庚三等及其家屬窩主十九人俘斬三百餘人又禽萬年賊首王垂七等送京師伏誅江西遂平方事之殷也諫懲陳金失一意用兵而巡撫任漢巽懦先爲布政使膏贊金主撫亟上首功追賊遂緩以致餘黨復熾至是言官劾漢竝及諫南贛巡撫周南兵部請召漢還命諫兼領巡撫甲子江西新淦縣賊張元二等作亂知縣

劉天錫縣丞朱公倣等率兵勦之而公倣通賄于賊棄兵逃去天錫傷于賊幾死尋獲公倣巡撫任漢請治其罪詔逮公倣仍令都御史俞諫會鎮巡官尅期勦滅以靖地方十一月己巳江西紀功給事中黎奭奏姚源之賊尙有數千時懷反側東鄉諸處仍宜防禦而溫處南贛之兵多病死逃回所恃者惟邊軍然止長于騎射未能舍馬而戰請增調附近永順保靖等處精銳士兵三千人相爲犄角以殄殘賊兵部議以苗蠻反覆徵調非宜必不得已則福建浦城縣民快亦驍勇可用從之詔選浦城土兵一千選二司官一人統領仍聽俞諫等

調遣

薛應旂曰正德間平中原盜用邊兵平蜀盜用苗兵
平江西盜用狼兵而兩京十三省之兵舉無一可恃
自是以後不但邊兵日益驕悍而福建省城之兵亦
效尤矣

癸未以災傷免浙江甯波府五縣衢州府四縣及衢州
守禦千戶所秋糧十八萬石有奇 是月兵部尙書何
鑑致仕鑑以諫召邊兵設勇士忤上意中官尤忌之甯
王宸濠謀復護衛鑑力遏之都督白玉以失事罷厚賄
豹房諸倖臣求復鑑執不從至是倖臣嗾詞事者發鑑

家僅取將校金錢言官交章劾鑑遂罷歸以左都御史
陸完代之完有才智急功名善交權勢劉暉許泰江彬
皆其部將後竝寵倖用事完遂得其力又與宸濠素善
濠久萌異志至是聞完掌本兵致書盛陳舊好踰年遂
請復護衛宸濠亂階始此都御史李士實致仕以侍郎
石玠代之 十二月辛丑吏部尙書楊一清論救逮問
下獄之巡按陝西御史劉天和王廷相二人者太監廖
鏜構之也初鏜填守陝西誅求無厭天和廷相相繼按
其地稍裁抑之遂致怨鏜之弟指揮使鵬時詔事中官
錢甯拜爲恩父甯每自豹房歸輒過鵬家止宿會鏜以

事謫南京閒住因鵬求解于甯遂復職未幾鏜奉旨蘭州采辦宜關白巡按天和以蘭州爲馬溥然所轄辭不往洛川妖民邵進祿謀爲亂事覺自首于官廷相釋之鏜遂撫奏天和違命竝及廷相釋賊事詔遣官校械繫二人至京師下鎮撫司拷訊獄久不釋先是有巡按雲南御史張璞爲填守雲南太監梁裕所構逮問死獄中一清等因言巡按御史責在振風紀禁奸貪否則人將指而議之且填守內臣縱皆安靜其隨從官舍頭目人等豈能盡循禮法今以小加裁抑卽成大隙信口撫拾何患無詞邇聞璞已死獄中天和等或疾疫相染或驚

憂不測傳之中外未免駭動人心又恐此後巡按官相率隱忍因之風紀掃地奸貪肆行其所關係實非淺鮮伏望特敕有司將天和等早具罪狀奏請發落以全大體而安人心疏入詔卽鞠實勘處以聞久之獄乃具降天和爲金壇縣丞廷相顧榆縣丞

國興天和廷相事僉州中官攷系之九年

據其謫降之年月也證之實錄一清等論

總制四川

都御史彭澤奏廖麻子之黨喻老人等爲官軍所敗率數十人走匿大巴山川陝之兵已足搜捕請罷邊兵還從之 甲辰遣南京刑部侍郎鄧璋振江西先是巡撫任漢奏江西自夏徂冬不雨省城內外竝各府縣火災

屢發延毀民居不可勝計加以溫疫流行寇盜爲害乞蠲糧稅仍振之乃命璋發本處預備倉及兩淮浙鹽課銀十萬兩備振 辛亥追贈誠意伯劉基太師始賜謚曰文成禮部議竝及翰林學士承旨宋濂國子祭酒宋訥皆賜謚于是謚濂曰文憲訥曰文恪

國興明史基傳賜謚在正德九年

蓋以八年之冬議賜謚九年始奉旨得之今據貴錄書于是月辛亥

癸丑以水災免

陝西平涼等六州縣夏稅一萬六千三百石有奇 是

冬祈雪

九年春正月乙丑朔進右副都御史周南爲右都御史總督兩廣軍務兼巡撫 丁卯南京十三道御史羅鳳

等上言甯王自交通劉瑾陳乞護衛愈生驕恣侵奪腴田搶剋富室自省城以至鄉境利之所在百計牢籠商旅不敢出入舟楫不敢停泊民之受害何可勝言撫按三司爲其所餌莫敢喙息甯負君恩不敢賈奇禍以忤宗室高煦竇鐫可深鑒也伏望諭令甯王改過自新無預有司之事仍榜諭江西百姓凡被王府侵占田產房舍者俱准訴復及令本省填巡三司各官謁見有時宴飲有節非禮餽送不許接受王府人役有生事擾民者執治其罪以消禍患之萌疏入不報 丁丑大祀南郊庚辰乾清宮災上每歲張燈費浮數萬及是甯王宸

濠別爲奇巧以獻令所遣人入宮懸掛多著柱附壁以
取新異上復于庭軒間依欄設氈幙貯火藥其中偶不
戒延燒宮殿乾清以內皆燼焉上往豹房臨視回顧光
焰燭天猶笑語左右曰是一棚大烟火也壬午以灾御
奉天門視朝撤寶座不設遂下詔罪已竝論文武百官
同加修省 癸未大學士楊廷和等以宮災自劾奏請
援漢廷策免例各賜罷歸別簡賢能以充委任竝請陛
下念皇天付託之重祖宗創業之艱天下生民仰戴之
切早朝宴罷以延接羣臣深居簡出以頤養聖體九廟
之蒸嘗必親其事兩宮之孝養必致其誠經筵勤日講

之御殿廷復面奏之規大開言路以達下情遣還邊兵以防外患革禁中市肆以肅內令出西僧于外以絕異端罷皇店之設以通商賈停不急之工以紓民力減免各處織造以節民財任用正直忠良之士親信老成持重之人夙夜孜孜勤求治理將見人心感悅天意可回疏入上優詔褒荅諭令仍舊供職而疏中所陳惟皇店欲嚴禁下人工作織造令所司條陳緩急來奏姑取一二事勉徇所請而已 戶科給事中呂經言乾清官者陛下之正寢祖宗之意欲萬世聖子神孫法天之行而永清海內也陛下舍乾清宮而遠處豹房忽儲貳而廣

蓄義子疎儒臣而昵近番僧棄文德而寵用邊戍輕朝
政而創開酒店信童豎而日事宴游君臣睽隔紀綱廢
弛是以天心赫怒顯示譴告陛下震驚不安悔悟求言
臣望乘此悔悟之機痛懲往日之弊數詔儒臣講求消
復之道退朝之暇端處寢宮四時庶享必親其事義子
番僧邊戍童豎俱宜罷遣豹房酒店俱宜拆毀政事委
諸六部各省委諸撫按讒諛賄賂奸貪不法委諸科道
法司仍令各以職掌詳陳利病之源且以考驗各官忠
佞而進退之將見元首旣明股肱自良庶事皆康而災
變自可弭矣河東巡鹽御史張士隆上疏曰陛下前有

逆瑾之變後遭薊盜之亂猶不知警方且興居無度狎
昵匪人積戎醜于禁中戲干戈于卧內徹旦燕遊萬幾
不理寵信內侍濁亂朝綱致民困盜起財盡兵疲禍機
潛蓄恐大命難保惟陛下深鑑之工科給事中潘埏上
疏曰陛下蒞阼九年治效未臻災祥迭見臣願非安宅
不居非大道不由非正人不親非儒術不崇非大閱不
觀兵非執法不成獄非骨肉之親不干政非汗馬之勞
不濫賞臣聞陛下好戲謔矣臣以爲入而內廷琴瑟鐘
鼓人倫之樂不必遊離宮以爲懽狎羣小以爲快也出
而外廷華裔一統莫非臣妾不必收朝官爲私人集遠

人爲勇士也聞陛下好佛矣臣以爲南郊有天地太廟有祖宗錫祉迎庥佛於何有番僧可逐而度僧可止也聞陛下好勇好貨好土木矣臣以爲誅奸遏亂大勇也不須馳馬試劍以自勞三軍六師大武也不須邊將戍軍以自擁任土作貢皇店奚爲闐闐駢闐內市安用阿房壯麗古以爲金塊珠礫也況養豹乎金碧熒煌古以爲塗膏歟血也況供佛乎是數者之好豈非可已而不已哉是時先後應詔陳言者部臣則楊一清劉春等翰林則修撰呂柟上言六事編修王思言三事科道則十三道御史羅縉等言六事監察御史施儒等言八事戶

科給事中石天柱雷震及戶部主事馮馴中書舍人何景明等語皆切至而天柱則以前星未曜儲位久虛陛下既不常御宮中又不預選宗室何以消禍本而永靈長景明亦言聖躬單立皇儲未建內無手足相倚之親外無肺腑可托之戚上不懌悉以煩瀆置之皆不報是月起致仕南京右副都御史陳壽爲右都御史巡撫陝西時太監廖堂填守陝西以貪暴著尙書楊一清以壽剛果特請起之 二月乙未朔南京十三道御史汪正等疏言陛下嗣位九年儲位尙虛請擇宗室幼而賢者一人置之左右以代宗席之禮盡晨昏之職俟皇子

誕生遣之歸國不報

據實錄在是年二月據奏至

月者自南京奏也

庚子上始微行夜至教坊觀樂

辛丑以

兵部右侍郎鄧璋爲右副都御史總制陝西延綏甯夏甘肅等處軍務時小王子北部皆犯邊諸番部落爲所侵擾往往寄寓甘肅城外居民驚竄耕牧皆廢廷議請增設總制大臣乃命璋往時璋奉使振江西命大理寺卿燕忠兼理代之 甲辰南京禮部尙書喬宇等疏言近見邸報知乾清宮灾累朝列聖寢息之所一旦蕩爲灰燼臣等不勝惶懼厯稽前代如魯新宮災漢凌室災未央宮災恩災史備書之以示警戒今日之災更有甚

焉謹按五行傳王者鄉明而治賢佞分別官人有序率由舊章禮重功勲則火得其性若信道不篤譏夫昌邪勝正則火失其性自上而降乃濫炎妄起燔宗廟燒官室京房易傳曰君不思道厥妖火燒官故災變之發所以明教誡也惟率禮修德可以禳之敬天以實不以文近年以來陛下視朝勤政不無疎濶經筵講學未見頻繁國本當建而宗藩之簡注不聞名分當正而義子之寵榮益盛番僧異端常留禁寺優伶賤役尙侍起居皇店設立盈耳嗟怨之聲邊兵拘留馳心戰鬥之事京師土木之繁興南京織造之工費凡此十事皆今日之重

且急者陛下思所以消弭天變莫先于此伏願復視朝之常規舉經筵之舊典選宗室之賢以備眷注黜義子之名以別嫌疑逐番僧斥優伶罷皇店遣邊兵停止京師土木之役取回南京織造之官而又簡任賢能修舉職業若臣等瘵曠宜先賜罷以謝天譴庶可化災爲祥轉禍爲福也疏入不報

丙午以禮部尙書勒貴兼文淵閣大學士預機務貴以宮僚舊臣故有是命

三編質實按王璉雙溪雜記云內閣劉忠去位楊廷和欲引門生靳貴代之朝廷以禮部尙書費宏代貴憾之後譏斥羅宏仍以貴代宏然攷明史武宗紀及明實錄宏以五月乙丑致仕在貴旣入閣之後並非以貴代宏且宏之去位以却帝王護衛之請事見明史宏傳亦非由貴譏構璉之所記皆不得其實也今按雙溪蓋以此詆廷和因及靳

貴耳余州政誤極爲廷和辯而此一事偶遺之三編之論是也 癸丑彭澤討四川賊

平之先是喻思倬卽喻老人等奔入通巴僅百餘人據險時出虜掠澤會總兵時源督諸軍圍之賊窮蹙降敗畧盡思倬復率其黨走匿西鄉山中官軍追至木竹溝夜禽之竝斬其黨數十人思倬創重死遂以捷聞于時澤駐漢中請班師命未下而內江賊駱松祥榮昌賊范藻等復熾澤又移師討之禽松祥等再請班師巡按御史王汝舟請暫留澤鎮撫詔澤移駐保甯尋進澤左都御史太子太保初澤將西討問計于大學士楊廷和廷和曰以君才賊不足平所戒者班師早耳澤後平鄆本

恕等卽請班師而餘黨復蝟起不可制澤旣發復留乃

嘆曰楊公先見吾不及也

及異憲章錄系平川賊于正月紀事本末系平駱松祥于

八年十二月平范謀于本年正月官錄蓋指奏報月日也

是月大學士楊廷和費

宏梁儲再請致仕皆慰留之

三月丙子江西副使胡

世甯上疏曰江西之盜勦撫二說相持臣愚以爲無難

決也已撫者不誅再叛者無赦初起者亟勦如是而已

顧江西患非盜賊甯府威日張不逞之徒羣聚而導以

非法上下諸司承奉太過數假火災奪民廬地採辦擾

及旁郡蹂藉徧于窮鄉臣恐良民不安皆起爲盜臣下

畏禍多懷二心禮樂刑政漸不自朝廷出矣請于都御

史俞諫任漢專委一人或別選公忠大臣填撫敕王止治其國毋撓有司以清亂源消意外變章下兵部尙書陸完議以撫勦事宜委之于諫至所言違制擾民疑出僞託宜令王約束之得旨報可 辛巳賜唐皋等進士及第出身有差 是月甯王宸濠請復護衛屯田初陸完遷兵部尙書宸濠貽書欲復護衛屯田完荅書令以祖制爲詞宸濠遂遣人輦金帛鉅萬寓所善教坊臧賢家徧遣用事貴人屬錢甯爲內主完應之事旣成大學士費宏從弟案其妻與宸濠妃兄弟也知之以告宏宏入朝完迎謂曰甯王求護衛可復乎宏曰不知當日革

之何故完曰今恐不能不予宏怫然曰公自任之會宏
充廷試讀卷官月之十五日甯王奏至中官以疏下內
閣擬旨竟許之宏不知也是時大學士楊廷和在內閣
不能力爭時論以是惜之致聖憲章錄謂復護衛事票
旨實出廷和故中官持奏過
東閣言只請楊師傳到閣諸公不必動勞弇州史乘攷
誤謂此出雙溪雜記之說甯王請復護衛閣臣惟鉛山
一人持正不予若楊新都爲首輔自有不能辭其咎者
第不得以汙名蟻之耳今按實錄中亦無此語故三編
據書之但云中官賁奏請內閣宏執不予而明史諸王
傳亦但言乘宏請廷試卷取中旨行之不及廷和票旨
之事此得其實今從之○明史本紀系復護衛于四月
丁酉掘詔下之月日諸書系之三月掘下內閣之月日
也今仍書之三月
下爲復護衛張本
是春江西巡撫俞諫擊臨川賊斬
其魁陳九譚懿昌等遣叅將李隆等擊新淦賊賊踞萬

山中僭稱王且八年隆等深入悉就禽俘斬千七百餘人先是有劇賊徐九齡者初嘯聚建昌醴源已出沒江湖間積三十年黃州德安九江安慶池州太平咸被其害命諫移師討之攷異平臨川賊明史俞諫傳書于是年諸書皆系之三月而平徐九齡紀事本末系之八年十二月據實錄則十年七月事也明史因平賊前後事彙記耳今分書之夏四月

月丁酉詔復甯王護衛竝屯田予之六科給事高滂十

三道御史汪錫等攷異錫明史陸完傳及實錄作賜力惟三編改作錫注仁和人今據之

爭章竝下部而陸完從中庇之久不覆丙午南京禮科

給事中徐文溥復上疏曰自古親親莫如兄弟然必以義制之者所以防其過而全之也秦鍼以多車出奔鄭

段以貳郤自蹙漢文之時七國方睦而賈誼鼂錯切切
爲帝言之卒有吳濞等之變曩者甯藩不靖英廟革其
護衛屯田及逆瑾亂政重賄謀復瑾既伏誅陛下又革
之正所謂制之以義而安全之也乃曰驅使乏人夫晏
居深遠靡征討之勞安享尊榮無居守之責何所用而
乏人且王暴行大彰剝削商民脅制官吏招誘亡賴廣
行劫掠致舟航斷絕邑里蕭條萬民莫不切齒及今止
之猶恐不逮顧可縱之加恣假翼于虎乎貢獻本有定
制乃無故馳騁飛騎出入都城伺察動靜況今海內多
故天變未息意外之虞實未易料宜裁以大義勿徇私

情罪其獻謀之人逐彼偵事之使宗社幸甚時宸濠與
援甚衆疏入人咸危之上但責其妄言而已又請擇建
儲貳不報 五月甲子振順天河間真定保定大名廣
平等被災州縣饑發存留本年起運京邊糧十之二三
以備振濟又減免逋稅 乙丑大學士費宏致仕宏以
持宸濠復護衛屯田事權倖之受甯府賄者交銜之錢
甯數偵宏事無所得以御史余珊嘗劾宏當國其從弟
案宜引避不得留翰林案亦嘗峻絕濠使甯遂以此譖
于上責宏陳狀宏自伏乞休竝案罷歸恩禮無所及惟
給驛而已 癸酉罷江西布政使鄭岳斥爲民江西提

學副使李夢陽冠帶閒住初夢陽提學江西令甲副使
屬總督而夢陽與陳金抗禮金惡之監司五日會揖巡
按御史夢陽不往揖又諭諸生毋謁上官卽謁長揖毋
跪于是御史江萬實亦惡之淮王府校與諸生爭夢陽
笞校王怒奏之下御史按治夢陽恐萬實右王許萬實
詔下金行勘金檄岳勘之夢陽僞撰萬實劾金疏以激
怒金竝構岳子沄通賄事時夢陽爲甯王撰陽春書院
記王亦惡岳乃助夢陽劾岳萬實復計夢陽短及僞撰
奏章事遂謝病去而參政吳廷舉吉安知府劉喬素與
夢陽有隙廷舉因奏夢陽侵官尋亦乞休不俟命徑去

夢陽再劾喬受賄事是時金以軍事繁又夢陽方善于甯府乃請付巡撫任漢勘理漢時已謝病乃命大理卿燕忠會紀功給事中黎奭勘理于是給事中王爌言江西多事之秋各官不能協濟時艱乃逞其私忿自相搏噬均宜究治故岳旣得罪而夢陽亦以陵轢同列挾制上官忠旣往鞠羈夢陽廣信獄中諸生萬餘爲訟寃不聽時夢陽以黨于宸濠亦干清議遂坐廢

及異夢陽鄭岳事俱見明

史本傳而胡世宙奏甯王事已爲鄭岳訟寃故實錄系以初字敘其顛末至此事處分實錄系之是月癸酉今從之夢陽黨于宸濠明史傳中但摘其爲撰陽春書院記而實錄則謂其剛愎險薄又藉甯府以報仇由是得罪公議無復有齒錄之者語雖過當亦非盡誣今仍据明史本傳書之

己丑命右都御

史彭澤提督甘肅軍務經理哈密初土爾番既據哈密

復遣使赴甘肅言巴雅濟

齊諒見前

不能守國故遣將代守

乞犒賜總制鄧璋甘肅巡撫趙鑑以聞且請遣大臣經

畧閣臣楊廷和等交章薦澤澤時駐四川保甯數請班

師方召還未行而有是命澤久在兵間猷之以鄉土爲

辭且引疾推璋及咸甯侯仇鉞可任上優詔慰勉乃行

督延綏甯夏固原軍駐甘肅六月壬辰朔甯王宸濠

奏請鑄護衛及經歷鎮撫司千百戶所印凡五十有八

詔予之仍致書于王于是宸濠益自恣遣承奉劉吉等

招江湖劇盜楊清李甫王儒等百餘人入府號曰把勢

乙卯開雲南銀礦時有雲南瀾滄衛軍丁周達奏雲南如大理楚雄洱海臨安等處皆有銀場可採辦以益國課下戶部議銀礦之弊多派貧民賠納而利歸奸徒況近年久已封閉豈可復開竝請治達罪詔不許乃以太監梁裕等理其事丙辰罷工部署員外郎韓邦靖爲民初邦靖言廷臣頃因災變極陳闕失未見聽納前後以言得罪者未蒙召用乞開延攬採擇之門以收人心上怒遂下錦衣獄會以天熱疎遣獄囚而不及邦靖給事中李鐸等言邦靖雖狂妄之見出于忠懇之誠乞原情聽斷以全國體乃付法司擬罪詔邦靖出位妄言

罷爲民且諭吏部自今凡言事黜謫者毋再起用

韓邦

靖三編作兵部員外郎證之實錄蓋工部主事署員外郎疑卽本部也今從實錄

秋七月乙

丑小王子犯大同宣府先是小王子與官軍戰于萬全衛得利去總兵官仇鉞以捷聞而寇益深入肆掠至是連營數十復入宣大塞而別遣萬騎掠懷安總制叢蘭告急京師戒嚴乃命太監張永提督宣府大同延綏等處軍務都督白玉充總兵官發京營官軍二萬人以都督僉事昌佐指揮姜義充左右叅將統之又發宣府京營諸軍凡六千二百四十人命太監張忠監督而以都督溫恭充副總兵官仍聽永節制 戊辰寇自懷安掠

順聖川游擊將軍張勛守備田琦廣彪皆力戰死之御史于鏊參劾總兵官劉淮副總兵陶杰等請逮治兵部議以臨敵易將兵家所忌俟事平勘處從之 丙子以旱災免順天河間保定三府所屬州縣稅糧 壬午巡按湖廣御史王相奏致仕兵部尙書劉大夏歷官中外四十餘年關節不通門無私謁天下高之今年踰八十家徒壁立乞如例優其廩隸竝錄其子下戶部議覆謂宜從公論特加優禮未幾忽傳內旨己之蓋大夏主兵部時于中人多所裁抑故復爲所沮云 是月加陸完太子太保中官錢甯力也 初韃靼別部額布勒阿爾

托蘇等

舊作阿爾禿斯

避小王子居甘肅塞上漸深入攻破堡

寨五十三殺掠官軍居民一千二百有奇孳畜器械糧
餉已失以數萬計巡撫張翼等匿不奏襲取塞上老弱
殘病及小王子所敗已者斷其首冒爲首功凡一千九
百餘級其所斬獲不及二百以捷奏者先後十一次每
奏輒賜敕獎勵至增祿米賜蟒衣而寇熾如故至是巡
按御史成文紀驗功次因劾翼等欺蔽狀會僉事張璉
亦與翼訐奏翼疑文主之乃與總兵王勛撫奏文事因
辯其驗功之枉詔復遣給事中邵錫刑部郎中閔槐往
勘具得其實內批且宥之蓋翼等皆有內援故也 八

月辛卯朔日有食之 癸巳甯王宸濠奏邇者宗枝日繁多以選用儀賓點檢校尉爲由巧索民財肆其橫暴乞降敕痛懲前弊其有怙惡不悛者許臣繫治尙書陸完等譽其忠勤請如奏戒敕榜諭及許王竝治其不法者于是優詔褒荅竝通行各省巡撫一體禁約是時宸濠逆焰方張其爲此奏一以掩飾已罪沽取美名一以束縛宗支肆其吞噬而上不之覺也 丁酉以災傷免山西平陽府各州縣稅糧 辛丑以災傷免真定等四府稅糧之半 小王子寇白羊口及浮圖峪連營數十里詔保定副總兵張勇游擊將軍劉寶馳往禦之 乙

已京師地震歲星晝見凡十日 己未小王子入甯武
關掠忻州定襄甯化守備指揮陳經率官兵三百餘出
城鏖戰久之矢盡持刀奮擊力盡死之三百人幾殲焉
巡按御史劾副總兵神周屢遭挫衄請逮治詔周停俸
戴罪經及死事軍士贈恤有差 以災傷免陝西西安
府蒲城等二十一州縣稅糧 九月壬戌小王子率五
萬餘騎自宣府萬全衛新開口入踰懷安趨蔚州等處
剽掠又三萬餘騎入平虜城南都御史叢蘭總兵官白
玉等領兵追擊潛使人于田間寘毒飯中如農家餉而
設伏以待敵至中毒伏猝發多死者乃引去 癸亥以

旱災免廬鳳淮揚等府縣夏稅 庚午上以狎虎被傷
踰月不視朝先是上觀搏虎一日虎迫上前江彬趨撲
乃解上戲曰吾自足辦安用爾至是果爲虎所傷編修
王思疏言孝宗皇帝子惟陛下一人當爲天下萬世自
重近者虎逸于柙驚及聖躬臣聞之且駭且懼陛下卽
位以來于茲九載朝亡不勤政太廟不親享兩宮曠于
問安經筵倦于聽講揆厥所自盖有二端嗜酒而荒其
志好勇而輕其身由是戒懼之心日忘縱恣之欲日進
好惡出乎喜怒政令出于多門紀綱積弛國是不立上
天示警日食地震宗社之憂凜若朝夕夫勇不可好陛

下已薄有所懲矣至于荒志廢業惟酒爲甚陛下露處
外宮日湏于酒廝養雜侍禁衛不嚴卽不幸變起倉卒
何以備之此臣所大憂也疏入留中者數日忽傳旨降
達方雜職遂謫爲三河驛丞前此言事謫官者率有譴
責語至是不言諱之也思爲吏部尙書王直之曾孫人
以爲無忝厥祖云 是月填守陝西太監廖堂進上用
鋪花毡幄一百六十二間先是傳旨以紙式尺寸令堂
及巡撫陳壽依式製造重門堂廡庖湑戶牖之屬無不
悉具自是上出郊祀陳設幄幕不復宿齋宮矣堂以此
腹削贏金數萬將遺權倖壽檄所司留備振堂銜之謀

傾壽未幾壽調南京兵部侍郎 冬十月甲午刑部主

事李中上言曩者逆瑾竊弄威權陛下悟而誅之天下

莫不仰陛下之聖武夫何今日大權未收儲位未建義

子未革紀綱日弛風俗日壞小人日進君子日退士氣

日靡言路日閉名器日輕賄賂日行禮樂日廢刑罰日

濫民財日殫軍政日敝瑾既誅矣而善治一無可舉蓋

陛下之惑於異端也夫以禁掖深嚴豈異教所得雜今

乃于西華門豹房之地建護國佛寺延進番僧日與起

處忠言日遠邪說日滋臣願陛下毀佛寺出番僧以謹

華夷大防又妙選儒臣朝夕進講則以上諸弊可以次

第革矣疏入不報尋謫廣東驛丞 己酉工部以修乾
清坤甯宮上請命尙書李鐸督營建工部侍郎劉丙總
督四川湖廣貴州採木而以署郎中主事伍全于湖廣
鄧文璧于貴州李寅于四川分理之又遣官于浙江江
西直隸徽州等處收買竹木旣而傳旨令太監谷大用
張雄總理皆賜之敕 戊午敕左都督劉暉充總兵官
填守山西地方兼提督三關從兵部議也 降吏科給
事中張原爲貴州新添驛驛丞原上疏言六事一汰冗
食一慎工作一禁貢獻一明賞罰一廣言路一進德業
時原拜官未數月傳旨原驟陞言路輒撫往事奏擾遂

有是謫 十一月庚申命兵部選團營官軍六千人分前後二營與勇士竝四衛營營各三千人以右都督張洪都指揮桂勇賈鑑李隆分領之于西官廳操練洪勇士營勇前營鑑後營隆四衛營 辛酉廢歸善王當汭爲庶人王魯荒王裔孫莊王陽鑄幼子也初流賊攻兗州當汭率家衆乘城取護衛弓弩射却賊賜敕獎諭遂以武健聞數與卒袁質舍人趙巖校射質巖家東平武斷爲鄉人所惡同里吏部主事梁穀少不檢頗倚質等爲助旣貴厭苦之又與千戶高乾有怨會有銜質巖者誣穀云質巖且爲亂穀心動因竝指乾等告變于尙書

楊一清兵部議以大兵駐濟南伺變而當沅父魯王入
長史馬魁譖言當沅結質巖欲反慮禍及奏于朝上遣
司禮太監溫祥大理少卿王純等往按問圍當沅第索
其兵械則前射賊弓弩牛敝讞穀所指皆平人魁懼事
敗乃諷所厚陳環及術士李秀佐證之復以書及賄抵
填守太監畢真使逮二人詰問已而二人以實對及書
賄事爲真所發于是御史李翰臣劾穀魁誣罔而近倖
方欲邀功責翰臣爲叛人掩飾下之獄謫德州判官而
釋穀等不問御史程啟充疏言穀魁煽惑流言死不赦
罪縱首禍而謫言者非國體不報廷臣議當沅罪卒無

所坐乃以藏護衛兵器違祖制廢當洹爲庶人戍質等
肅州所連逮多殲死魁坐誣當斬中官送當洹之高牆
當洹大慟曰冤乎觸牆死聞者傷之王傳中明史本紀
系之是月辛酉据實錄也今從之

三編發明曰趙巖袁質隸卒賤人耳而當洹與之善
其武斷鄉曲亦未必不倚藩府爲聲勢當洹豈得爲
無過然不過交遊之濫誣以作亂初無實據而兵部
張皇其事卽議駐兵伺變遂至馬魁挾怨而售譖魯
王懼禍以證子迨按問無狀讞訊已明當洹卒無所
坐之罪而以射賊旣斂之弓弩撫拾以斷斯獄在近

倖貪功而樂禍固不足深責彼廷臣旣正魁罪則宜爲當泣昭雪其誣而復廢爲庶人仍使含冤而死於非命豈得謂持讞之平哉

庚午小王子等入花馬池掠牧放官馬五百三十二匹
叅將尹清追之兵出百餘里與寇戰于方山中流矢死
陝西總制鄧璋以聞詔巡按御史查勘 癸未以災傷
免河南開封等府陽武等二十四州縣秋糧 是月晉
楊一清少傅兼太子太傅時給事中王昂以選法不公
劾一清奉旨切責一清上書自劾而保留昂不許謫昂
休甯縣丞昂不避權貴一清能受盡言時兩賢之 十

二月壬辰太白晝見自上月甲申至是凡九日 甲寅

工部奏營建宮室庀材鳩工計直白金百萬兩請于南

北直隸及天下各府州縣加賦于民歲徵十之二恐徵

輸不及暫于內帑借其半以給用上終不欲動內帑乃

令于一歲中盡徵之自是催科旁午海內騷然矣明史

稿是月甲寅加兩畿浙江賦一百萬兩建乾清宮明史

史則云建乾清宮加天下賦一百萬兩據此則一百萬

之賦乃加之天下非獨兩畿浙江也證之實錄甲寅工

部奏營建宮室料價工役當用銀百萬兩宜派浙江等

布政司並南北直隸府州縣均賦于民每年帶徵十之

二史稿所記似即本此然既云浙江等布政司則不但

浙江也明史改爲加天下賦此得其實故三編亦據之

目中言帝終不欲假用內帑令于一歲中盡徵之明史

食貨志不具今是歲乾清宮災廷臣應詔言事者後

據三編書之

先相望會崑山周廣自莆田吉水知縣以治最徵授御史乃疏陳四事其畧曰三代以前未有佛法況刺麻又釋教所不齒者耳貫銅環身衣赭服殘破禮法肆爲奸邪宜投之四裔以禦魑魅奈何令近君側爲羣盜興兵口實哉昔禹戒舜曰毋若丹朱傲惟慢游是好周公戒成王曰毋若商王紂之迷亂酗于酒德今之伶人助慢游迷亂者也唐莊宗與伶官戲狎一夫夜呼倉皇出走臣謂宜遣逐樂工不復籍之禁內所以放鄭聲也陛下承祖宗統緒而羣小獻媚熒惑致三宮鎖怨蘭殿無徵雖陛下春秋鼎盛獨不思萬世計乎中人積有資產猶

畜妾勝以圖嗣續未有專養螟蛉不念祖宗繼嗣者也
義子錢甯本宦豎蒼頭濫寵已極乃復攘效貨賄輕蔑
王章甚至投刺于人自稱皇庶子僭踰之罪所不忍言
陛下何不慎選宗室之賢者置諸左右以待皇嗣之生
諸義兒養子奪其名爵乃所以遠佞人也末復言近今
討賊不效如陳金陸完輩宜加切責令尅期成功以贖
前罪甯見疏大怒留之不下傳旨謫廣東懷遠驛丞主
事曹琥論救亦被謫甯怒不已使人遮道刺廣廣知之
易姓名變服潛行四百餘里乃免武定侯郭勛鎮廣東
承甯風旨以白金試廣廣不受伺廣謁御史攝致軍門

筆擊幾死御史力救之始解取異事見明史廣傳傳中不言因災變陳言而疏中
所論皆近日事今
增系之是年之末